



Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allanngortinneqarnissaa pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut. Taamaaliornikkut atorfirmut atatillugu inigisap sivikinnerpaamik ukiuni tallimani attartoreerneratigut attartortup naliginnaasumik attartukkatut inigilersinnaaqqullugu.

(Inatsisartunut ilaasortaq Anthon Frederiksen, Partii Naleraq)
(Siullermeernera)

Siunnersuuteqartutulli Demokraatini kissaatigaarput suliffeqarnerup iluani nuttarnerusoqarsinnaasariaqaraluatoq. Siunnersuuteqartoq ilalerparput oqarmat innuttaasut ilaat atorfirmut aalajangersimasunut qilersoqqasutut misigisarmata, allamik suliffittaaraluarunik atorfirminnut atatillugu inigisartik annaasussaagamikku.

Malittarisassat ullutsinni atuuttut naapertorlugit atorfirmut atatillugu inigisaq ukiuni arfineq-marlunni najoqqaartariaqarpoq attartortittakkatut naliginnaasutut tigussagaanni. Demokraatini isumaqataavugut tamatuma allanngortittariaqarneranut. Siunnersuuteqartup siunnersuutigaa ukiuni tallimani attartoreerneratigut inigisaq tiguneqarsinnaanngussasoq.

Tamanna tunngaviusumik tapersorsorparput aammali ammaffigaarput ukiut sisamat imaluunniit ukiut pingasut najoreeraanni inigisaq inigilivinneqarsinnaassasoq. Taamaattumik kissaatigaarput Sanaartornermut Ataatsimiititaliap piffissami aggersumi sulinermini misissussagai ukiut pingasut, sisamat tallimalluunniit qaangiunneranni inigisamik tiguisinnaanngornissaq sunik iluaqutissartaqarnerasoq ajoqutissartaqarnerlorluunniit.

Qilanaarpugut tassani suleqataanissatsinnut.

Taamatut kaammattuuteqarluta siunnersuutip Sanaartornermut Ataatsimiititaliami suliareqqinneqarnissaa innersuussutigaarput.